

**საზოგადოებრივი მნიშვნელობის დაწესებულებებში ესთეტიკური და
კოსმეტიკური პროცედურების წარმოებისას ინფექციების პრევენციის და
კონტროლის სანიტარული ნორმების დაცვის „შემოწმების აქტის“ ფორმის შევსების**

მეთოდური რეკომენდაცია

საზოგადოებრივი მნიშვნელობის დაწესებულებებში ესთეტიკური და კოსმეტიკური პროცედურების წარმოებისას ინფექციების პრევენციის და კონტროლის სანიტარული ნორმების დაცვის „შემოწმების აქტი“ მოიცავს მოთხოვნებს, რომლებიც გაწერილია „საზოგადოებრივი მნიშვნელობის დაწესებულებებში ესთეტიკური და კოსმეტიკური პროცედურების წარმოებისას ინფექციების პრევენციისა და კონტროლის სანიტარული ნორმების“ დამტკიცების შესახებ“ საქართველოს მთავრობის 2015 წლის 14 სექტემბრის №473 დადგენილებაში.

საზოგადოებრივი მნიშვნელობის დაწესებულებებში ინფექციების კონტროლის მიმართულებით არსებული მდგომარეობის შეფასებისათვის მიზანშეწონილია სტანდარტული კითხვარის გამოყენება, რომელიც იძლევა როგორც დაწესებულების გარემოს, ასევე, ინფექციების კონტროლის სისტემის მიმართ წაყენებული მოთხოვნების შესრულებაზე კონტროლის შესაძლებლობას.

აქტში თითოეული შეკითხვა ფასდება კი/არა-ს პრინციპით („კი“ - როცა კონკრეტული საკითხი სრულდება, „არა“ - როცა ვერ ან არ სრულდება). შესაბამისად, შეფასებისას მოინიშნება ერთ-ერთი პასუხ-თავანი („კი“ ან „არა“).

აქტში ასევე არის შენიშვნის ველი, რომელიც გამოყენებულია ზოგიერთი საკითხის დასაკონკრეტებლად. ამასთან, ცალკეულ შემთხვევაში შენიშვნის ველში საჭიროა სათანადო მონიშვნის გაკეთებაც (მაგალითად, სასტერილიზაციო სამუშაოების ჩატარებისას შენიშვნის ველში დაკონკრეტდება „საკუთარი ძალებით“ ან „ხელშეკრულებით“ - ჩაწერის საშუალებით და სხვ.).

კონტროლი ხორციელდება გამოკითხვის ან დაკვირვების/დათვალიერების მეთოდით, ცალკეულ შემთხვევაში, შესაძლებელია შესაბამისი დოკუმენტაციის მოთხოვნაც (მაგალითად, სტერილიზაციის ჟურნალი, ხელშეკრულებები, შიგა ბრძანებები და სხვ.).

აქტი შედგება შესავალისა და 2 ნაწილისაგან; მონიტორინგის განხორციელებისას ყველა ობიექტში სავალდებულოა შევსებული იყოს კითხვარის შესავალი და ნაწილი I. ხოლო ნაწილი II-ის 7 დანართიდან შეივსება მხოლოდ ის დანართები, რომელ საქმიანობასაც დაწესებულება ახორციელებს (მაგალითად, ობიექტში ხდება მხოლოდ თმის მოვლა და პირსინგი - ამ შემთხვევაში ნაწილი II-დან შეივსება მხოლოდ დანართი #1 – „თმის მოვლა და პარსვა“ და დანართი #3 – „პირსინგი“).

შემოწმების აქტის ფორმის შესავალი ნაწილი

შესავალ ნაწილში ივსება კონტროლს დაქვემდებარებული დაწესებულების მაიდენტიფიცირებელი ინფორმაცია:

- I. **დაწესებულების დასახელება** - შესამოწმებელი დაწესებულების დასახელება უნდა იყოს აღებული შესაბამისი დოკუმენტიდან სრულად;
- II. **დაწესებულების სამართლებრივი ფორმა** - უნდა მოინიშნოს (გადაიხაზოს კვადრატით), რომელი სამართლებრივი ფორმითაც არის ობიექტი დარეგისტრირებული, თუ არც „შპს“ და არც „ინდ/მეწარმე“ არ არის, უნდა მოინიშნოს „სხვა“ და დაკონკრეტდეს შესაბამის ხაზზე;
- III. **დაწესებულების რეგისტრაცია** - დაწესებულება რეგისტრირებულად შეიძლება ჩაითვალოს და მოინიშნოს (გადაიხაზოს კვადრატით) პასუხში „კი“ იმ შემთხვევაში, თუ ის რეგისტრირებულია მეწარმეთა

და არასამეწარმეო (არაკომერციული) იურიდიული პირების რეესტრში - როგორც „საზოგადოებრივი მნიშვნელობის დაწესებულება“, წინააღმდეგ შემთხვევაში მოინიშნება „არა“; თუ დაწესებულება რეგისტრირებული არ არის, შემოწმება წყდება, ივსება ადმინისტრაციული აქტი ობიექტის ექსპლუატაციის შეჩერების მოთხოვნით (ტექნიკური რეგლამენტის მუხლი 3-ის, პუნქტი 3-ის მოთხოვნა - რეგისტრაციის გარეშე საზოგადოებრივი მნიშვნელობის დაწესებულების საქმიანობა აკრძალულია) და ეგზავნება ადგილობრივი მმართველობის ორგანოებს - განსახორციელებლად;

- IV. დაწესებულების საიდენტიფიკაციო/რეგისტრაციის/ კოდი სრ-დან - საჯარო რეესტრიდან მინიჭებული კოდის ნახვა აუცილებელია სარეგისტრაციო დოკუმენტებში - საჯარო რეესტრის ამონაწერში ან სხვა დოკუმენტში, რომელსაც წარმოადგენს ობიექტის ხელმძღვანელი ან სხვა პირი;
- V. დაწესებულების მისამართში ჩაიწერება ის ფაქტიური მისამართი, სადაც ობიექტია განთავსებული;
- VI. ხელმძღვანელის/პასუხისმგებელი პირის გვარი, სახელი, ტელეფონი, E-mail - ხელმძღვანელის გვარი, სახელი კითხვარში გადაიტანება ოფიციალური დოკუმენტიდან, საკონტაქტო ინფორმაცია - გამოკითხვით;
- VII. შემოწმებაზე პასუხისმგებელი დაწესებულება - ჩაიწერება ის დაწესებულება, ვინც ატარებს შემოწმებას.
- VIII. შემოწმებაზე პასუხისმგებელი პირის გვარი, სახელი - შემოწმებელი ჩაწერს საკუთარ გვარს და სახელს;
- IX. შემოწმების ჩატარების თარიღი - გრაფაში ჩაიწერება შემოწმების დაწყების თარიღი და დაწყების და დასრულების დროები;
- X. დაწესებულების საქმიანობის ძირითადი მიმართულებები - ჩამონათვალში უნდა იყოს მონიშნული (გადახაზული კვადრატით) ყველა ის საქმიანობა, რომელიც შემოწმების მომენტისთვის ობიექტზე ხორციელდება, მაგ. თმის მოვლა/პარსვა, პირსინგი და ელექტროლიზისი (ელექტროეპილაცია);
- XI. შერჩევითი შემოწმება - მოინიშნება იმ შემთხვევაში, თუ იმ წელს ობიექტი პირველად მოწმდება;
- XII. განმეორებითი შემოწმებიდან ერთ-ერთი მოინიშნება იმ შემთხვევაში, თუ ობიექტს უკვე მიცემული აქვს ვადა და მიმდინარეობს მისი გადამოწმება - პირველი ან ზოგიერთ გამონაკლის შემთხვევებში - მეორე გადამოწმებაც.

ნაწილი I: ზოგადი მოთხოვნები

ინფორმაცია ობიექტის შესახებ

1. ზოგადი მოთხოვნები

1.1 პუნქტის - „ინფექციური დაავადებების გავრცელების მართვისთვის აუცილებელი კონკრეტული აქტივობების ჩამონათვალი თვალსაჩინო ადგილას არის განთავსებული“ - პასუხად „კი“ დაფიქსირდება მაშინ, როცა ჩამონათვალი არის გაკრული თვალსაჩინო ადგილას და მასში შეტანილია შემდეგი ვალდებულებები:

ოპერატორი ვალდებულია მართოს ინფექციური დაავადებების გავრცელების რისკები შემდეგი ღონისძიებების გატარებით:

- ა). ხელების დაბანა მომხმარებლის მომსახურების დაწყებამდე და დასრულებისთანავე, ან პროცედურის მიმდინარეობისას, მისი დროებით შეწყვეტის შემთხვევაში (მაგ.: სატელეფონო საუბრის გამო);
- ბ). იმ პროცედურების წარმოებისას, როდესაც შესაძლებელია კონტაქტი სისხლთან და ბიოლოგიურ სითხეებთან, ერთჯერადი ხელთათმანების გამოყენება;
- გ). იმ პროცედურების წარმოებისას, როდესაც შესაძლებელია სისხლისა და ბიოლოგიური სითხეების გაფრქვევა, დამცავი ტანსაცმლისა და სათვალის გამოყენება;
- დ). ასეპტიკის წესების გამოყენება პროცედურების წარმოებისას;

- ე). პროცედურების წარმოება სათანადოდ გასუფთავებული, დამუშავებული და სტერილური ინსტრუმენტებისა და დამხმარე მასალის გამოყენებით;
- ვ). სისუფთავის დაცვა პროცედურების წარმოებისათვის განკუთვნილ სათავსებში;
- ზ). ბასრ საგნებთან უსაფრთხო მოპყრობის (მ.შ. გადაყრის) წესები;
- თუ ჩამონათვალი არა აქვთ, ან არ არის გამოკრული თვალსაჩინო ადგილას, ან გამოკრულია, მაგრამ ჩამონათვალში არ არის ზემოთ აღნიშნული საკითხები, ამ შემთხვევაში მოინიშნება პასუხი „არა“.

2. დასუფთავება, დეზინფექცია, სტერილიზაცია

2.1. პუნქტზე - „დაწესებულებაში არსებული საგნების ზედაპირები და აღჭურვილობა გაწმენდილი და სუფთა“ – „კი“ პასუხი მოინიშნება იმ შემთხვევაში, თუ არ იქნა ნანახი ვიზუალურად აღქმადი მტვერი საგნებზე. დათვალიერებას ექვემდებარება დაწესებულების ყველა სათავსი, სადაც ხორციელდება სერვისის მიწოდება და სერვისისთვის მომზადება.

2.2 პუნქტში - „გამოყენებული თეთრეულის ცვლა და რეცხვა ხდება მართებული რეჟიმის დაცვით“ - დადებითი პასუხის მოსანიშნად აუცილებელია ინახოს სუფთა და ნახმარი თეთრეულის შესანახი კარადები (ყუთები), ხელშეკრულება თეთრეულის რეცხვის შესახებ ან შესაბამისი რაოდენობისა და ფართობის სათავსები და სარეცხი საშუალებები ადგილზე რეცხვისთვის, ან ავტომატური სარეცხი, საშრობი და საუთაბელი საშუალებები; პასუხი „არა“ მოინიშნება ყველა იმ შემთხვევაში თუ ვერ იქნა ნანახი განცალკევებული სუფთა და ნახმარი თეთრეული; სარეცხი საშუალება; გასარეცხად, გასაშრობად და გასაუთაველად საჭირო ინვენტარი და სივრცე ადგილზე რეცხვისთვის ან ხელშეკრულება თეთრეულის რეცხვაზე.

2.3 პუნქტზე - „დაწესებულებას აქვს ოპერირების წესი/პროცედურა (წერილობითი ფორმით) სტერილიზაცია-დეზინფექციის განხორციელების თაობაზე“ - დადებითი პასუხი მოინიშნება თუ დაწესებულება წარმოადგენს „სტერილიზაცია-დეზინფექციის ჩატარების წესებს“, გაწერილს შესაბამისი ინსტრუქციების მიხედვით (საქართველოს მთავრობის 2015 წლის N185 დადგენილების - „სამედიცინო, საზოგადოებრივი ჯანმრთელობისა და საზოგადოებრივი მნიშვნელობის დაწესებულებებში დეზინფექციისა და სტერილიზაციის ტექნიკური რეგლამენტის დამტკიცების შესახებ“ და #473 დადგენილების - „საზოგადოებრივი მნიშვნელობის დაწესებულებებში ესთეტიკური და კოსმეტიკური პროცედურების წარმოებისას ინფექციების პრევენციისა და კონტროლის სანიტარიული ნორმების“ დამტკიცების შესახებ, შესაბამისად); და თუ ადგილზე ნახული იქნება ყველა ის აღჭურვილობა და საშუალება, რომელიც აღწერილი იქნება „სტერილიზაცია-დეზინფექციის ჩატარების წესებში“; თუ არ იქნება ნანახი აღნიშნული დოკუმენტი და/ან ადგილზე არ აღმოჩნდება მისი შესრულების პირობები, მაშინ პასუხი იქნება „არა“.

2.4 “მრავალჯერადი გამოყენების „კრიტიკული საგნების“ გასასუფთავებლად და გასასტერილებლად ადგილზე არსებობს შესაბამისი პირობები და საშუალებები”, შეკითხვის პასუხგასაცემად უნდა შემოწმდეს ადგილზე არის თუ არა ყველა საშუალება წინასასტერილიზაციო დამუშავებისთვის (წყალი, სარეცხი საშუალებები, შესაბამისი ჯაგრისები, შესაბამისი სივრცე, ინდ. დაცვის საშუალებები, ქვეყანაში რეგისტრირებული დეზინფექტანტი სარეცხი ინსტრუმენტების დაბალი დონის დეზინფექციისთვის, დეზ.ხსნარის მოსამზადებელი ინსტრუქცია და სხვ.), ინსტრუმენტების შესაფუთად, გასასტერილებლად და მათ სტერილურად შესანახად; დადებითი პასუხი იქნება ყველა ჩამოთვლილი გარემოებების არსებობისას, თუ ერთი მათგანიც კი ამოვარდნილია, პასუხი იქნება „არა“. თუ ობიექტზე ხმარებაში არა აქვთ „კრიტიკული საგნები“, შენიშვნაში გაიხაზება - „არ შეესაბამება“.

2.5 პუნქტში - „ნახევრად კრიტიკული საგნებისთვის“ დაწესებულებას აქვს გასუფთავების, პასტერიზაციის ან ქიმიური დეზინფექციის საშუალებები“ - დადებითი პასუხი იქნება მაშინ, როცა ადგილზე იქნება ნანახი ყველა საშუალება მათ გასასუფთავებლად (წყალი, სარეცხი საშუალებები, შესაბამისი ჯაგრისები, შესაბამისი სივრცე), ქვეყანაში რეგისტრირებული დეზინფექტანტი ინსტრუმენტების მაღალი დონის ქიმიური დეზინფექციისთვის და ან აპარატურა ინსტრუმენტების პასტერიზაციისთვის, დეზ.ხსნარის

მოსამზადებელი ინსტრუქცია, დადებითი პასუხი იქნება ყველა ჩამოთვლილი გარემოებების არსებობისას.

2.6 პუნქტზე - „არაკრიტიკული საგნების“ გასასუფთავებლად და დაბალი/საშუალო დონის დეზინფექციის ჩასატარებლად ადგილზე არსებობს შესაბამისი პირობები და საშუალებები - დადებითი პასუხის გასაცემად ადგილზე უნდა იყოს ნანახი ყველა საშუალება მათ გასასუფთავებლად (წყალი, სარეცხი საშუალებები, შესაბამისი ჯაგრისები, შესაბამისი სივრცე), და ქვეყანაში რეგისტრირებული დეზინფექტანტი ინსტრუმენტების დაბალი/საშუალო დონის დეზინფექციისთვის; გასასუფთავებელი პირობების არარსებობის შემთხვევაში პასუხი იქნება „არა“.

2.7 პუნქტის - „დაწესებულება აწარმოებს სტერილიზაციის პროცედურების აღიკვეთს სპეციალურ ჟურნალში“, პასუხი დადებითი იქნება თუ ადგილზე შემოწმების მომენტისთვის, შევსებული იქნება ტექნიკური რეგლამენტის დანართი 2-ის ცხრილი 4-ის ფორმით წარმოებული „სტერილიზაციის აღიკვეთის ჟურნალი“; ჟურნალის არ არსებობის, და/ან მისი შეუვსებლობის შემთხვევაში, პასუხი იქნება - „არა“.

2.8 „ერთჯერადი მოხმარების „კრიტიკული საგნები“ გამოყენების შემდეგ იყრება და ნადგურდება კანონმდებლობით დადგენილი წესით“ - დადებითი პასუხის გასაცემად უნდა ინახოს ერთჯერადი ჰერმეტიკული ტარის მარაგი და მისი გამოყენება რეალობაში და ბასრი საგნებისთვის განკუთვნილი სპეციალური კონტეინერების მარაგი და მისი გამოყენება, ასევე ხელშეკრულება შესაბამის ორგანიზაციასთან სახიფათო ნარჩენების გატანა-განადგურებაზე.

2.9 „სადეზინფექციო ხსნარებს აქვს მწარმოებლის ინსტრუქცია და მისი მოხმარება ხდება ინსტრუქციის შესაბამისად“ - ამ საკითხის გასაკონტროლებლად ადგილზე უნდა ნახული იყოს მწარმოებლის ინსტრუქცია და ხსნარის მომზადებაზე პასუხისმგებელმა პირმა უნდა იცოდეს, როგორ მზადდება დეზ.ხსნარი, რაც შეიძლება გადამოწმდეს ინსტრუქციის წაკითხვით; თუ დაწესებულებაში გამოყენებული ხსნარის მომზადების წესი ემთხვევა ინსტრუქციით გათვალისწინებულ წესებს, პასუხი იქნება „კი“, ხოლო თუ ადგილზე არ არის მწარმოებლის ინსტრუქცია, პასუხი იქნება „არა“.

2.10 პუნქტზე - „მაღალი დონის დეზინფექტანტების ეფექტურობის განსაზღვრა ხდება სპეციალური საშუალებებით“, დადებითი პასუხი იქნება თუ ადგილზე ექნებათ აღნიშნული საშუალებები, მაგალითად ტესტ-ჩხირები, შესაბამისი ინსტრუქცია და მომსახურე პერსონალს ეცოდინება მათი გამოყენება, წინააღმდეგ შემთხვევაში დაიწერება პასუხი „არა“.

2.11 პუნქტზე - „დაწესებულებაში სადეზინფექციო ხსნარებთან დაკავშირებული სამუშაოების ჩატარებისას გამოიყენება ინდივიდუალური დაცვის საშუალებები (ნიღაბი, სპეციალური ტანსაცმელი, წინსაფარი, ხელთათმანი (საყოფაცხოვრებო, არასამედიცინო), სათვალე ან სახის დამცავი ეკრანი/ფარი და სხვ.)“ - პასუხი იქნება „კი“, ყველა ზემოთ ჩამოთვლილი საშუალებების მინიმუმ ერთდღიანი მარაგის ადგილზე არსებობის შემთხვევაში; შემოწმების მომენტისთვის, რომელიმე საშუალების მარაგის არ არსებობისას პასუხი იქნება „არა“.

2.12 „ყველა იმ საშუალებას, რომელიც გამოიყენება ინსტრუმენტებისა და სხვა საგნების რეცხვის პროცესში, უტარდება დაბალი დონის დეზინფექცია გარეცხვის შემდეგ და ინახება მშრალად“ - ამ მოთხოვნის დადებითად შესაფასებლად ადგილზე უნდა არსებობდეს რომელიმე სადეზინფექციო საშუალება დაბალი დონის დეზინფექციისთვის და მშრალად შენახული დასასუფთავებელი ინვენტარი; შესაძლებელია პროცესზე დაკვირვებაც მათი გამოყენების დროს.

3. ინფრასტრუქტურისა და აღჭურვილობის უსაფრთხოება

3.1 პუნქტში - „სათავსების კედლები და იატაკი დეფექტების გარეშე, გლუვია და სანიტარული დამუშავებისათვის მოსახერხებელი“ - პასუხი მოინიშნება ვიზუალური შეფასებით.

3.2 „სანიტარული კვანძის კედლები დაფარულია სველი წესით დამუშავებისა და დეზინფექციისადმი მედეგი საფარით“ - კითხვაზე პასუხი გაეცემა სანიტარული კვანძის დათვალიერების შემდეგ.

3.3 „აღჭურვილობის, ავეჯისა და ინვენტარის საფარი მოსახერხებელია გასუფთავებისა და დეზინფექციისადმი“ - პასუხი გაიცემა ობიექტის დათვალიერების შემდეგ, და ინვენტარზე არ უნდა იყოს მრავალჯერადი მოხმარების საფარი, რომელსაც ყოველ მოხმარებელზე ვერ გამოცვლიან.

3.4 პუნქტს - „სამუშაო სივრცე აღჭურვილია ცივი და ცხელი წყლით უზრუნველყოფილი ხელსაბანი ნიჟარით“ - პასუხი გაეცემა დათვალიერების შემდეგ, დადებითი პასუხისთვის აუცილებელია ცივი და ცხელი წყლის უწყვეტი არსებობა ობიექტში.

3.5 პუნქტს, „ხელის დასაბანი ნიჟარა აღჭურვილია თხევადი საპნითა და ერთჯერადი ხელსახოცების საკმარისი რაოდენობით“, დადებითი პასუხი გაეცემა იმ შემთხვევაში თუ ადგილზე დათვალიერებით ობიექტს აღმოჩნდება ჩამოთვლილი საშუალებების მინიმუმ ერთდღიანი მარაგი.

3.6 პუნქტს - „დაწესებულებაში გამოყენებული ქიმიური (სადეზინფექციო) საშუალებები ინახება განცალკევებით, ორიგინალურ შეფუთვაში, უსაფრთხოების წესების დაცვით“, პასუხი გაეცემა საშუალებების შესანახი პირობების დათვალიერების შემდეგ, ქიმიური სადეზინფექციო საშუალებები დაცული უნდა იყოს შემთხვევითი პირებისგან, უნდა ქონდეს შესაბამისი წარწერა და არ უნდა ინახებოდეს ღია მდგომარეობაში.

3.7 პუნქტი - „დასუფთავებისათვის განკუთვნილი ინვენტარი (ჯაგრისი და სხვ.) არის მარკირებული გამოყენების ტიპის შესაბამისად“, მაკონტროლებლისგან მოითხოვს ობიექტის დასალაგებელი ინვენტარის დათვალიერებას და დადებითი პასუხი შეივსება მხოლოდ მაშინ, როცა ნანახი იქნება მათი მარკირება ნებისმიერი ფორმით.

4. ნარჩენების უსაფრთხო მართვა

4.1 პუნქტი - „დაწესებულებაში წარმოქმნილი არასახიფათო ნარჩენები გროვდება ერთჯერად პაკეტებში ან მრავალჯერადი გამოყენების ჭურჭელში“, მოითხოვს ნარჩენების შეგროვების ადგილის დათვალიერებას, თუ ნარჩენები გროვდება ერთჯერად პაკეტებში, ან მრავალჯერადი გამოყენების ჭურჭელი 3/4-ზე მეტად არ არის გადავსებული და გარეცხილია. მიმდებარე ტერიტორიაზე არის საყოფაცხოვრებო ნარჩენების კონტეინერი, სადაც იცლება აღნიშნული ჭურჭელი, პასუხი იქნება „კი“.

4.2 პუნქტი - „არასახიფათო ნარჩენების 3/4 -მდე შევსებული მრავალჯერადი გამოყენების ჭურჭლის შიგთავსი და ერთჯერადი პაკეტები თავსდება მუნიციპალური ნარჩენებისთვის განკუთვნილ კონტეინერში“, მოწმდება მიმდებარე ტერიტორიის დათვალიერებით და თუ მიმდებარე ტერიტორიაზე არის საყოფაცხოვრებო ნარჩენების კონტეინერი, სადაც იცლება აღნიშნული ჭურჭელი, პასუხი იქნება „კი“.

4.3 პუნქტი - „დაწესებულების სახიფათო ნარჩენები გროვდება ერთჯერად ტარაში, საიდანაც 3/4-ით შევსების შემდგომ ხდება მისი ჰაერისგან დაცლა და ჰერმეტიზება“, შემოწმდება ერთჯერადი ტარის მარაგის დათვალიერებით (მინიმუმ ერთი დღის მარაგი მაინც უნდა ქონდეთ) - აქვთ თუ არა ნარჩენები პაკეტებში ჩაყრილი, სახიფათო ნარჩენების გატანა-განადგურებაზე დადებული ხელშეკრულების გაცნობით და გასატანად გამზადებული ნარჩენების დათვალიერებით (არის თუ არა 3/4-ით შევსებული პაკეტი ჰაერისაგან დაცლილი და მჭიდროდ თავმოკრული).

4.4 პუნქტი - „ბასრი ინსტრუმენტები (ნემსები, კალმები და ა.შ.) გროვდება სხვა სახიფათო ნარჩენებისაგან განცალკევებით, მყარ, ერთჯერადი გამოყენების სპეციალურ ტარაში“, მოწმდება ერთჯერადი გამოყენების სპეციალურ ტარის მარაგის დათვალიერებით (მინიმუმ ერთი დღის მარაგი მაინც უნდა ქონდეთ), ბასრი საგნების ნარჩენების გატანა-განადგურებაზე დადებული ხელშეკრულების გაცნობით და გასატანად გამზადებული ნარჩენების დათვალიერებით.

4.5 პუნქტზე - „დაწესებულებაში დაუშვებელია სახიფათო და არასახიფათო ნარჩენების შერევა“, დადებითი პასუხი იქნება იმ შემთხვევაში, თუ პუნქტები 4.2, 4.3 და 4.4 დადებითად იქნება შეფასებული, რომელიმე პუნქტზე უარყოფითი პასუხი, საფუძველი გახდება ამ პუნქტზეც უარყოფითი პასუხის გაცემის.

4.6 პუნქტი - „სახიფათო ნარჩენების გატანა, ტრანსპორტირება, დამუშავება ან/და განადგურებაზე დაწესებული პუნქტის აქვს დადებული ხელშეკრულება შესაბამის ორგანიზაციასთან“, მოწმდება აღნიშნული ხელშეკრულების მოთხოვნით და გაცნობით.

5. მოთხოვნები პერსონალისა და პროცედურებისადმი

5.1 პუნქტი - „დაწესებულება უზრუნველყოფილია ჭრილობის დასამუშავებელი ანტისეპტიკური და შესახვევი საშუალებებით“, მოწმდება ობიექტში აღნიშნული საშუალებების მარაგის დათვალიერებით.

5.2 პუნქტზე - „მომსახურე პერსონალი პროცედურის ჩატარებისას იყენებს სუფთა ტანსაცმელსა და, საჭიროების შემთხვევაში, ინდივიდუალურ დაცვის საშუალებებს (ხალათი, ხელთათმანი, სათვალე, ნიღაბი)“, დადებითი პასუხი გაიცემა პერსონალის ჩაცმულობის დათვალიერებით და ინდ. დაცვის საშუალებების საკმარისი მარაგების არსებობისას, შესაძლებელია მათი შეძენა/ხარჯვის ბალანსის გაკეთება და დადგენა იმის, თუ რა პერიოდში რამდენი ხელთათმანი და ნიღაბი იხარჯება ობიექტის საჭიროებებზე მომხმარებლების საშუალო რაოდენობასთან შეფარდებით.

ნაწილი II.

სპეციფიური მოთხოვნები ესთეტიკური და კოსმეტიკური პროცედურებისადმი

დანართი #1.

6. თმის მოვლა და პარსვა

6.1 პუნქტის - „მომხმარებლის კისრის გარშემო შეხებისას გამოიყენება სუფთა პირსახოცი“, შესამოწმებლად უნდა ინახოს სუფთა და ნახმარი პირსახოცების მარაგები, თუ მათი რაოდენობა შეესაბამება მომხმარებელთა საშუალო რიცხვს დღეში და კონტროლის დროს მიმდინარე სამუშაოზე მოხმარებული პირსახოცის დათვალიერებით, ვიზუალურად დასტურდება რომ ის არის პირველად ხმარებაში, მაშინ შეიძლება დაიწეროს პასუხი „კი“.

6.2 პუნქტის - „თმის დასამუშავებლად განკუთვნილი „არაკრიტიკული“ ინვენტარი ყოველი გამოყენების შემდეგ ირეცხება ან უტარდება დაბალი დონის დეზინფექცია“, შესაფასებლად ოპერატორს დაესმის კითხვა - როგორ ასუფთავებს „თმის დასამუშავებლად განკუთვნილ „არაკრიტიკული“ ინვენტარს და უნდა მოთხოვნილი იყოს სარეცხი საშუალების და დეზ.საშუალების მარაგის დათვალიერება, რის შემდეგაც გადაწყდება დადებითი იქნება თუ უარყოფითი პასუხი.

6.3 პუნქტზე - „მაკრატელს და დამჭერს (რომელიც კანს ეხება) უტარდება საშუალო ან მაღალი დონის დეზინფექცია“, დადებითი პასუხი იქნება იმ შემთხვევაში, თუ ოპერატორი სისტემატიურად მარაგდება საკმარის რაოდენობის დეზ.საშუალებით და თუ იცის როგორ უნდა ჩაატაროს საშუალო ან მაღალი დონის დეზინფექცია.

6.4 პუნქტს - „გასაპარსად განკუთვნილი საპარსის პირები არის ერთჯერადი და გამოყენებისთანავე იყრება ბასრი საგნებისთვის განკუთვნილ სპეციალურ კონტეინერში“, დადებითი პასუხი გაეცემა თუ ოპერატორი მომარაგებულია საპარსის ერთჯერადი პირების მინიმუმ ერთი დღის რაოდენობით და თუ ადგილზე ინახება ბასრი საგნებისთვის განკუთვნილი სპეციალური კონტეინერები.

6.5 პუნქტზე - „სახელური და საპარსი პირის ბუდე, როგორც „ნახევრადკრიტიკული“ ჯგუფის იარაღი, ყოველი გამოყენების შემდეგ იწმინდება და დეზინფიცირდება“, დადებითი პასუხის გასაცემად ეს იარაღები უნდა იყოს მინიმუმ 2-ზე მეტი, ადგილზე უნდა იყოს დეზ. საშუალებები თავისი მომზადების ინსტრუქციით და გამოკითხვით ოპერატორი უნდა ერკვეოდეს მათი მოხმარების წესებში.

6.6 პუნქტზე - „ბასრი საპარსი (სამართებელი) იწმინდება და სტერილდება“, პასუხის გასაცემად უნდა შემმოწმებელმა დაათვალიეროს გასტერილებული და ნახმარი სამართებლების შენახვის პირობები, მათი რაოდენობა და სტერილიზაციისთვის საჭირო დროის შესაბამისობა სტერილიზაციის ჟურნალის მიხედვით.

6.7 პუნქტზე - „ბასრ საპარსს, რომელიც გამოიყენება თმის შესაჭრელად, აქვს კანის დაზიანებისგან დამცავი“ პასუხის გასაცემად, უნდა დათვალიერებული იქნეს საპარსი და დამცავის არსებობის შემთხვევაში მოიხაზოს „კი“.

6.8 პუნქტს - „თმის მელირებისათვის გამოსაყენებელი ქუდი, როგორც „ნახევრად კრიტიკული“ ყოველი გამოყენების შემდეგ დეზინფიცირდება“, დადებითი პასუხი გაეცემა იმ შემთხვევაში, თუ დათვალიერებისას ობიექტზე იხმარება 2 ან მეტი ქუდი და არის საკმაო რაოდენობის დეზ.საშუალებები მოხმარების ინსტრუქციით.

6.9 პუნქტზე - „სადეზინფექციო სითხეში ჩალაგების წინ, ყველა საგანი და ინსტრუმენტი ირეცხება და შრება სუფთა ხელსახოცით“, პასუხის გასაცემად დათვალიერებული იქნება სივრცე, სადაც დეზინფექცია ტარდება, თუ ადგილზე აღმოჩნდა ყველა საჭირო საშუალება ამ პუნქტის განსახორციელებლად, ამ შემთხვევაში იქნება პასუხი „კი“.

6.10 პუნქტს - „საპარსისა და თმის მოვლისთვის განკუთვნილი საგნებისა და იარაღების დამუშავებისთვის გამოიყენება დაბალი დონის სადეზინფექციო საშუალება (მაგ.: ამონიუმის ნაერთი)“, დადებითი პასუხი ექნება იმ შემთხვევაში თუ ადგილზე აღმოჩნდა დაბალი დონის დეზ.საშუალებების საკმაო რაოდენობა, მინიმუმ ერთი დღის საკმარისი, თავისი ინსტრუქციით და შესაბამისი ინვენტარით.

6.11 პუნქტს - „დამუშავებული და სუფთა ინსტრუმენტები ინახება ცალკე სხვა საგნებისგან“, პასუხი გაეცემა ინსტრუმენტების შესანახი ადგილის დათვალიერებით.

6.12 პუნქტზე - „ნებისმიერი ერთჯერადი ნემსი, ბასრი და მჭრელი იარაღი, რომელიც გამოიყენება თმის დახვევისა და დაგრძელებისათვის ან/და შეხებაშია მომხმარებლის ან მომსახურე პერსონალის კანთან, გამოყენების შემდეგ თავსდება ბასრი საგნებისთვის განკუთვნილ კონტეინერში“, დადებითი პასუხი გაეცემა, თუ ობიექტი მომარაგებულია ბასრი საგნებისთვის განკუთვნილი კონტეინერების საკმაო რაოდენობით (მინიმუმ ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ბასრი საგნები ჩაყრილი იყო აღნიშნულ კონტეინერში.

დანართი #2.

7. ფრჩხილების მანიკური და პედიკური

7.1 პუნქტს - „ფრჩხილებზე მომსახურების გაწევის წინ ხდება მომხმარებლის ფრჩხილების დათვალიერება და ფრჩხილის სოკოს აღმოჩენის შემთხვევაში არ ტარდება მანიპულაციები და ეძლევა რეკომენდაცია მიმართოს ექიმს“, მხოლოდ მომხმარებელთა ფრჩხილების დათვალიერებით შეიძლება გაეცეს პასუხი, ყველა დანარჩენ შემთხვევაში შემმოწმებელი კმაყოფილდება ოპერატორის ცოდნით - რომ არ უნდა მოემსახუროს დაავადებულ ფრჩხილებიან კლიენტს.

7.2 პუნქტი - „ფრჩხილების სერვისისთვის საჭირო აღჭურვილობა და ინსტრუმენტები (რეცირკულაციის სისტემების ჩათვლით) მომხმარებლებს შორის შუალედში სუფთავდება და უტარდება საშუალო ან მაღალი დონის დეზინფექცია“, დადებითად შეიძლება შეფასდეს თუ ადგილზე არის საკმაო რაოდენობის დეზ.საშუალებები (მინიმუმ ერთი დღის მარაგი) და ოპერატორის ცოდნით.

7.3 პუნქტზე - „თითოეული გამოყენების შემდეგ, ფეხის აბაზანა სუფთავდება სარეცხი საშუალების გამოყენებით და უტარდება დეზინფექცია საშუალო ან მაღალი დონის სადეზინფექციო საშუალებით“,

დადებითი პასუხი გაიცემა თუ ადგილზე არის საკმაო რაოდენობის სარეცხი და დეზ.საშუალებები და შესაბამისი ინვენტარი, ასევე ოპერატორის ცოდნით.

7.4 პუნქტზე - „სისხლდენის შემაჩერებელი საშუალებები არის ერთჯერადი და იყრება სახიფათო ნარჩენებისთვის განკუთვნილ კონტეინერში“, დადებითი პასუხი გაიცემა, თუ ობიექტი მომარაგებულია ერთჯერადი სისხლდენის შემაჩერებელი საშუალებებით და სახიფათო ნარჩენებისთვის განკუთვნილი კონტეინერების საკმაო რაოდენობით (მინიმუმ ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში სახიფათო საგნები ჩაყრილი იყო აღნიშნულ კონტეინერში.

7.5 პუნქტზე - „სისხლდენის შესაჩერებლად დაუშვებელია სისხლის შემაჩერებელი ფანქრების გამოყენება“, დადებითი პასუხი იქნება გაცემული ობიექტზე სისხლდენის ერთჯერადი შემაჩერებელი საშუალებების მარაგის დათვალიერებით, ობიექტს არ უნდა ქონდეს სისხლის შემაჩერებელი ფანქრები.

7.6 პუნქტს - „კანის მთლიანობის დარღვევისას, სისხლდენის დასრულების შემდეგ ხდება მისი დამუშავება ანტისეპტიკური ხსნარით და ედება ერთჯერადი სამედიცინო პლასტიკი ან სუფთა ნახვევი“, პასუხი უნდა გაეცეს ობიექტზე არსებული ანტისეპტიკური ხსნარების, ერთჯერადი სამედიცინო პლასტიკის ან სუფთა შესახვევი მასალების მარაგების დათვალიერებით.

დანართი #3.

8. პირსინგი

8.1 პუნქტს - „პირსინგისთვის გამოსაყენებელი ყველა სამკაული სტერილურია“, პასუხი უნდა გაეცეს მარაგში არსებული სამკაულების დათვალიერების შემდეგ.

8.2 პუნქტის - „საყურის გასახსნელი და ჩამკეტი ბრტყელტუჩა ყოველი გამოყენების შემდეგ იწმინდება და სტერილდება“, დადებითად შესაფასებლად ოპერატორს უნდა ქონდეს მინიმუმ ორი ბრტყელტუჩა, მათ შორის ერთი სტერილური, ადგილზე უნდა ინახოს გასაწმენდი და გასასტერილებელი ინვენტარი, მათი გასტერილების შესახებ ჩანაწერები უნდა იყოს სტერილიზაციის აღრიცხვის ჟურნალში, რომელიც უნდა შედარდეს პროცედურების აღრიცხვის ჟურნალს.

8.3 პუნქტის - „პირსინგის გასაკეთებლად კანის ზედაპირი იწმინდება ანტისეპტიკური ხსნარით“, დადებითი პასუხისთვის აუცილებელია ანტისეპტიკური ხსნარის მარაგის დათვალიერება.

8.4 პუნქტს - „მოსანიშნად იხმარება მხოლოდ ერთჯერადი გამოყენების ინსტრუმენტები“, პასუხი გაეცემა მოსანიშნად სახმარი ერთჯერადი გამოყენების ინსტრუმენტების მარაგის დათვალიერებით.

8.5 პუნქტის - „გახვრეტისთვის იხმარება ერთჯერადი სტერილური ინსტრუმენტები“, დადებითი პასუხისთვის საჭიროა ერთჯერადი სტერილური ინსტრუმენტების მარაგის დათვალიერება.

8.6 პუნქტზე - „პირსინგის დროს ნახმარი ერთჯერადი ინსტრუმენტები გამოყენების შემდეგ (მაშინვე) თავსდება ბასრი საგნებისთვის განკუთვნილ სპეციალურ კონტეინერში“, დადებითი პასუხი გაიცემა, თუ ობიექტი მომარაგებულია ბასრი საგნებისთვის განკუთვნილი კონტეინერების საკმაო რაოდენობით (მინიმუმ ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ნახმარი ერთჯერადი ინსტრუმენტები ჩაყრილი იყო აღნიშნულ კონტეინერში.

8.7 პუნქტის - „ინსტრუმენტების დასალაგებელი დაფა არის გლუვზედაპირიანი და გამძლე რეცხვისა და დეზინფექციისთვის“, შესაფასებლად საჭიროა ინსტრუმენტების დასალაგებელი დაფის დათვალიერება.

8.8 პუნქტი - „ყოველი მომსახურების წინ ხდება ინსტრუმენტების დალაგება დაფაზე, რომელსაც გადაფარებული აქვს ერთჯერადი ან მრვაჯერადი სტერილური ხელსახოცი“, პირსინგის მიმდინარეობის პროცესში შეიძლება შეფასდეს, თუ ეს არ ხერხდება, მაშინ უნდა დათვალიერებული იყოს ერთჯერადი ან სტერილური ხელსახოცების მარაგის არსებობა ობიექტზე.

8.9 პუნქტის - „ყოველი გამოყენების შემდეგ დაფა იწმინდება და უტარდება დაბალი დონის დეზინფექცია“, შესაფასებლად დათვალიერებული უნდა იყოს ინსტრუმენტების დასალაგებელი დაფები, მათი საწმენდი და სადეზინფექციო საშუალებები და ინვენტარი.

8.10 პუნქტის - „ნახვრეტის გასაფართოებელი ჩხირი ირეცხება სარეცხი საშუალებით და უტარდება სტერილიზაცია“, შესაფასებლად ადგილზე უნდა ინახოს სტერილური ჩხირების მარაგი, სარეცხი საშუალებები და სასტერილიზაციო ინვენტარი, მათი გასტერილების შესახებ ჩანაწერები უნდა იყოს სტერილიზაციის აღრიცხვის ჟურნალში.

8.11 პუნქტზე - „კანის დასაჭიმად გამოიყენება ერთჯერადი გამოყენების, სტერილური - დახურულ-ბოლოიანი მიმღები მილი“, პასუხი გაეცემა ერთჯერადი გამოყენების სტერილური დახურულბოლოიანი მიმღები მილების დათვალიერებით.

8.12 პუნქტის - „ლიაბოლოიანი მიმღები მილები იწმინდება მავთულიანი ჯაგრისით და სტერილდება გამოყენებებს შორის“ შესაფასებლად ადგილზე უნდა იყოს საწმენდი და სასტერილიზაციო ინვენტარი, გასტერილებული და ნახმარი მილები და გასტერილება აღრიცხული უნდა იყოს სტერილიზაციის აღრიცხვის ჟურნალში, შედარდეს პროცედურების აღრიცხვის ჟურნალს.

8.13 პუნქტზე - „გამოყენებული ნემსი და საცობი (ერთმანეთისგან განცალკევების გარეშე) თავსდება ბასრი საგნებისთვის განკუთვნილ სპეციალურ კონტეინერში“, დადებითი პასუხი იქნება, თუ ობიექტი მომარაგებულია ბასრი საგნებისთვის განკუთვნილი კონტეინერების საკმაო რაოდენობით (მინიმუმ ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ბასრი საგნები ჩაყრილი იყო აღნიშნულ კონტეინერში.

8.14 პუნქტის - „პირსინგის შემდეგ, მრავალჯერადი გამოყენების ყველა ინსტრუმენტი გადის გაწმენდას და სტერილიზაციას“, შესაფასებლად ადგილზე უნდა ინახოს საწმენდი და სასტერილიზაციო ინვენტარი, გასტერილებული და ნახმარი მილები და გასტერილება აღრიცხული უნდა იყოს სტერილიზაციის აღრიცხვის ჟურნალში.

8.15 პუნქტის - „მომხმარებლებს ეძლევათ ზეპირი/წერილობითი ინფორმაცია პირსინგის შემდგომ მოვლაზე“, დადებითად შესაფასებლად ოპერატორს მზად უნდა ქონდეს მომხმარებლებისთვის საგანმანათლებლო ინფორმაცია პირსინგის შემდგომ მოვლასთან დაკავშირებულ საკითხებზე, კერძოდ:

- აბაზანისა და შხაპის მილებისას პირსინგის ადგილის მშრალად შენარჩუნება;
- სამკაულებთან შეხებისთვის ხელების გაწმენდის საჭიროება;
- ჭრილობის მოშრობამდე სამკაულის ბრუნვითი მოძრაობა;
- თავისუფალი ნახვევის მეშვეობით ჭრილობის ჰაერთან კონტაქტის საჭიროება;
- ჭრილობის შეხორცების სავარაუდო დრო, მოსალოდნელი გართულებები და სიმპტომები;
- მდგომარეობები, როცა საჭიროა ექიმის კონსულტაცია (მაგ.: მსუბუქი სიწითლე, ტკივილი, შეშუპება, ინფიცირება და სხვა);

8.16 პუნქტის - „პირსინგის დროს პერსონალს აცვია ხელთათმანი ორივე ხელზე“, შესაფასებლად მუშაობის პროცესზე შეიძლება დაკვირვება, თუ ეს არ ხერხდება საჭიროა ხელთათმანების მარაგის დათვალიერება.

8.17 პუნქტზე - „მრავალჯერადი ინსტრუმენტები იწმინდება და დეზინფიცირდება“, დადებითი პასუხი იქნება მაშინ თუ ადგილზე არსებობს საწმენდი და სადეზინფექციო საშუალებები და ინვენტარი.

8.18 პუნქტის - „პირსინგის წინ კანი მუშავდება ანტისეპტიკით“, შესაფასებლად შემოწმდება ადგილზე ანტისეპტიკების მარაგი.

8.19 პუნქტის - „ყოველი პირსინგის შემდეგ ხდება გამოყენებული ერთჯერადი ინსტრუმენტების უსაფრთხო მოცილება/გადაყრა“, დადებითი პასუხი იქნება, თუ ობიექტი მომარაგებულია სახიფათო ნარჩენებისთვის განკუთვნილი ერთჯერადი კონტეინერების საკმაო რაოდენობით (მინიმუმ ერთი დღის საკმა-

რისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ბასრი საგნები ჩაყრილი იყო აღნიშნულ კონტეინერში.

8.20 პუნქტის - „სტერილური სამკაულების ყუთი არის თავდახურულ მდგომარეობაში“ შემოწმება შესაძლებელია სამკაულების ყუთის დათვალიერებით.

8.21 პუნქტის - „პირსინგის ინსტრუმენტები ინახება შეფუთულ მდგომარეობაში/დახურულ კონტეინერში/ბიქსში ისე, რომ არ დაბინძურდეს“, შემოწმება შეიძლება დათვალიერებით.

8.22 პუნქტი - „ჩატარებული პროცედურების აღრიცხვა ხდება ჟურნალით ან ელექტრონულად“, აღრიცხვიანობის სანახავად შემოწმდება ქაღალდის ან ელექტრონული ჟურნალების წარმოება.

დანართი #4

9. ტატუირება, მიკროპიგმენტაცია

9.1 პუნქტზე - „ტატუირებისთვის გამოიყენება მხოლოდ ერთჯერადი სტერილური ნემსები“, პასუხის გასაცემად შემოწმებელი ათვალიერებს ერთჯერადი სტერილური ნემსების მარაგს და მათი რაოდენობა უნდა შედარდეს პროცედურების აღრიცხვის შურნალის მონაცემებს.

9.2 პუნქტზე - „ყველა მასალა ტატუსა და მიკროპიგმენტაციისთვის მზადდება უშუალოდ პროცედურის დაწყებამდე“, შეიძლება პასუხის გაცემა, თუ დათვალიერებული იქნება ტატუს გასაკეთებლად საჭირო მასალები და ინვენტარი, მომხმარებლის მოსვლამდე მომზადებული არ უნდა იყოს არც ერთი მასალა.

9.3 პუნქტზე - „ერთჯერადი მელნის თავები იყრება ყოველი მომხმარებლის შემდეგ ამ ტიპის ნარჩენებისათვის განკუთვნილ კონტეინერში“, პასუხის გასაცემად უნდა დათვალიერებული იყოს ერთჯერადი თავების მარაგი, სახიფათო ერთჯერადი ნარჩენების კონტეინერების მარაგი, სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში სახიფათო ნარჩენები ჩაყრილი იყო თუ არა აღნიშნულ კონტეინერში.

9.4 პუნქტზე - „ფერებს შორის სავლელად გამოყენებული სითხეები თავსდება ერთჯერად თავებში, რომელიც თითოეული მომხმარებლის შემდეგ იყრება“, პასუხის გასაცემად შეიძლება პროცესზე დაკვირვება, თუ ეს არ ხერხდება, მაშინ საჭიროა ერთჯერადი თავების მარაგების დათვალიერება.

9.5 პუნქტი - „ერთ მომხმარებელზე გამოყენებული ხელსაწმენდები/პირსახოცები იყრება/მუშავდება“, დადებითად შეფასდება, თუ ადგილზე აღმოჩნდა ცალკე - საკმაო რაოდენობის ახალი ხელსაწმენდები/პირსახოცები და ცალკე გამოყენებული.

9.6 პუნქტზე - „გამოყენებული ნემსები იყრება ბასრი საგნებისთვის განკუთვნილ სპეციალურ კონტეინერში“, დადებითი პასუხი გაცივმა, თუ ობიექტი მომარაგებულია ბასრი საგნებისთვის განკუთვნილი კონტეინერების საკმაო რაოდენობით (მნიშვნელოვანი ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ბასრი საგნები ჩაყრილი იყო აღნიშნულ კონტეინერში.

9.7 პუნქტის - „მრავალჯერადი ნემსის დამჭერი მოწყობილობა გამოყენებისთანავე სუფთავდება და სტერილდება“, შესაფასებლად ადგილზე უნდა ინახოს სარეცხი საშუალებები და სასტერილიზაციო ინვენტარი, მათი გასტერილების შესახებ ჩანაწერები უნდა იყოს სტერილიზაციის აღრიცხვის ჟურნალში.

9.8 პუნქტზე - „გამოყენებული ტრაფარეტები იყრება პროცედურის ბოლოს“, დადებითი პასუხის გასაცემად დათვალიერებული უნდა იყოს ერთჯერადი ტრაფარეტების მარაგი.

9.9 პუნქტზე - „მრავალჯერადი გამოყენების ჭურჭელი იშლება გასუფთავების წინ“, დადებითი პასუხი გაცივმა, თუ შესაძლებელია პროცედურაზე დაკვირვება, თუ არა შენიშვნაში იწერება, ვერ შეფასდა.

9.10 პუნქტის - „ტატუ იფარება ცალკე შეფუთული სტერილური ნახვევით, რომელიც განკუთვნილია ჭრილობებისთვის“, შესაფასებლად ადგილზე უნდა ქონდეთ ცალკე შეფუთული სტერილური სახვევი მასალები.

9.11 პუნქტზე - „მომხმარებლებს ეძლევათ ინფორმაცია ტატუს და მიკროპიგმენტაციის შემდგომი მოვლის შესახებ ზეპირი/წერილობითი“, დადებითი პასუხი იქნება თუ ადგილზე შეიძლება ამ ინფორმაციის ნახვა და მასში შეტანილი იქნება ინფორმაცია ტატუს და მიკროპიგმენტაციის შემდგომი მოვლის შესახებ, როგორცაა:

- ხელების გასუფთავება ტატუირებული ადგილების შეხებამდე;
- შესაძლო გართულებების, მათი ნიშნების და სიმპტომების შესახებ;
- მსუბუქი სიწითლის, ტკივილის და შეშუპების შესახებ;
- რეკომენდაცია, მიმართონ ექიმს, თუ სიმპტომები არ გაივლის 24 საათის განმავლობაში.

9.11 პუნქტზე - „მომხმარებლებსგან მიღებულია ინფორმირებული თანხმობები, პროცედურების დაწყებამდე“, დადებითი პასუხი იქნება იმ შემთხვევაში, თუ წარმოადგენენ ბოლო რამდენიმე პაციენტის ინფორმირებულ თანხმობას, რეგლამენტით დამტკიცებული შემდეგი ფორმით:

მომსახურების მიმწოდებელი საზოგადოებრივი მნიშვნელობის დაწესებულების დასახელება

მომხმარებლის წერილობითი ინფორმირებული თანხმობა მომსახურების გაწევაზე

მომხმარებლის სახელი და გვარი: _____

დაბადების თარიღი: _____/_____/_____ ასაკი: _____

(რიცხვი/ თვე/ წელი)

მომხმარებლის საკონტაქტო ინფორმაცია: _____

(მისამართი, ტელ, ელექტრონული ფოსტის მისამართი)

პროცედურის სახელწოდება და ლოკალიზაცია: _____

პროცედურის ჩატარებაზე პასუხისმგებელი ოპერატორის სახელი და გვარი: _____

მივიღე სრული და ამომწურავი ინფორმაცია მომსახურების გაწევის შესახებ. ოპერატორმა გამაცნო მომსახურების/პროცედურის მიზანი, მისი მიმდინარეობა, თავისებურებანი და შესაძლო გართულებები, პროცედურის შემდგომ კანის მოვლის წესები, რასაც ვადასტურებ ხელმოწერით

მომხმარებლის (ან მომხმარებლის კანონიერი წარმომადგენლის) ხელმოწერა: _____

თარიღი _____/_____/_____ დრო _____

(რიცხვი/თვე/წელი)

ვადასტურებ, რომ მომხმარებელს პასუხი გაეცა ყველა შეკითხვაზე, რაც შეეხება პროცედურას, შესაძლო გართულებებსა და რისკებს, პროცედურის შემდგომ კანის მოვლის წესებს.

პროცედურის ჩატარებაზე პასუხისმგებელი ოპერატორის ხელმოწერა: _____

თარიღი _____/_____/_____ დრო _____

(რიცხვი/თვე/წელი)

9.13 პუნქტი - „ჩატარებული პროცედურების აღრიცხვა ხდება ჟურნალით ან ელექტრონულად“, აღრიცხვიანობის სანახავად შემოწმდება ქალაქის ან ელექტრონული ჟურნალების წარმოება.

დანართი #5

10. აკუპუნქტურა

10.1 პუნქტზე - „აკუპუნქტურისათვის ხდება ერთჯერადი ნემსების გამოყენება, რომელიც გამოყენების შემდგომ თავსდება ბასრი ნარჩენების კონტეინერში (კითხვაზე „კი“ პასუხის შემთხვევაში გადადით კითხვაზე 10.3)“, დადებითი პასუხი გაიცემა, თუ ობიექტი მომარაგებულია აკუპუნქტურის ერთჯერადი ნემსების საკმაო რაოდენობით - პროცედურების აღრიცხვის ჟურნალის შესაბამისად, ბასრი საგნებისთვის განკუთვნილი კონტეინერების საკმაო რაოდენობით (მინიმუმ ერთი დღის საკმარისი რაოდენობა), აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და შემოწმების მომენტში ბასრი საგნები ჩაყრილი იყო აღნიშნულ კონტეინერში.

10.2 პუნქტის - „აკუპუნქტურის მრავალჯერადი ნემსები ინახება სტერილურად შეფუთული და იხსნება უშუალოდ მოხმარების წინ“, შეფასებლად უნდა დათვალიერებული იყოს მრავალჯერადი ნემსების შენახვის პირობები, სასტერილიზაციო ინვენტარის არსებობა, სტერილიზაციის ჟურნალში შესაბამისი ჩანაწერების არსებობა.

10.3 პუნქტზე - „აკუპუნქტურის მრავალჯერად ინსტრუმენტებს და ნემსების სახელურებს, ყოველი გამოყენების შემდეგ უტარდება წმენდა და მაღალი დონის დეზინფექცია“, პასუხის გასაცემად უნდა დათვალიერდეს სივრცე, სადაც ხდება ინსტრუმენტების წმენდა/დეზინფექცია - საწმენდი და სადეზინფექციო საშუალებების და ინვენტარის არსებობა, დეზ.საშუალების მომზადების ინსტრუქციის ქონა და მისი ცოდნა, საფუძველი იქნება დადებითი პასუხის გასაცემად.

10.4 პუნქტის - „ყოველი მომხმარებლის მომსახურების შემდეგ ინსტრუმენტებს (პინცეტები, მაშები), რომლებიც შეხებაშია ნემსებთან, უტარდება წმენდა და მაღალი დონის დეზინფექცია“, შეფასებისას, საწმენდი და სადეზინფექციო საშუალებების და ინვენტარის არსებობა, დეზ.საშუალების მომზადების ინსტრუქციის ქონა და მისი ცოდნა, საფუძველი იქნება დადებითი პასუხის გასაცემად.

10.5 პუნქტის - „ყოველი მომხმარებლის მომსახურების შემდეგ ელექტროსტიმულატორის მეტალის დამჭერებს უტარდება წყლით გაწმენდა/რეცხვა და საშუალო ან მაღალი დონის დეზინფექცია“, შეფასებლად, წყლის, სარეცხი და სადეზინფექციო საშუალებების და ინვენტარის არსებობა, დეზ.საშუალების მომზადების ინსტრუქციის ქონა და მისი ცოდნა, საფუძველი იქნება დადებითი პასუხის გასაცემად.

10.6 პუნქტის - „ყოველი პაციენტის მომსახურების შემდეგ დაუზიანებელ კანთან კონტაქტისთვის გამოსაყენებელ ინსტრუმენტებს უტარდება წმენდა და დაბალი დონის დეზინფექცია“, შეფასებისას, საწმენდი და სადეზინფექციო საშუალებების და ინვენტარის არსებობა, დაბალი დონის დეზ.საშუალების მომზადების ინსტრუქციის ქონა და მისი ცოდნა, საფუძველი იქნება დადებითი პასუხის გასაცემად.

10.7 პუნქტის - „აკუპუნქტურა ტარდება დაუზიანებულ და ჯანსაღ კანზე“, პასუხის გაცემა შესაძლებელია მხოლოდ ოპერატორის ამ საკითხის ცოდნის შეფასებით.

10.8 პუნქტზე - „მომხმარებლებისგან მიღებულია ინფორმირებული თანხმობები, პროცედურების დაწყებამდე“, დადებითი პასუხი იქნება იმ შემთხვევაში, თუ წარმოადგენენ ბოლო რამდენიმე პაციენტის ინფორმირებულ თანხმობას, რეგლამენტით დამტკიცებული, 9.11 პუნქტში დართული ფორმით:

10.9 პუნქტი - „ჩატარებული პროცედურების აღრიცხვა ხდება ჟურნალით ან ელექტრონულად“, აღრიცხვიანობის სანახავად შემოწმდება ქალაქის ან ელექტრონული ჟურნალების წარმოება.

11. ელექტროლიზისი (ეპილატორია)

11.1 პუნქტის - „ელექტროლიზისთვის გამოყენებული ნემსები ერთჯერადი და სტერილურია“, შესაფასებლად შემოწმებულმა უნდა დაათვალიეროს ნემსების მარაგი - მათი რაოდენობა, შენახვისა და შეფუთვის პირობები.

11.2 პუნქტის - „ეპილატორის ნემსის დამჭერის მოსახსნელი თავი იწმინდება და უტარდება მაღალი დონის დეზინფექცია ყოველი მომხმარებლის მომსახურების შემდეგ“, შეფასებისას, საწმენდი და სადეზინფექციო საშუალებების და ინვენტარის არსებობა, მაღალი დონის დეზინფექციის საშუალების მომზადების ინსტრუქციის ქონა და მისი ცოდნა, საფუძველი იქნება დადებითი პასუხის გასაცემად.

11.3 პუნქტზე - „ეპილატორის ზონარის შალითა იცვლება ყოველი მომხმარებლის მომსახურების შემდეგ ან იწმინდება და მუშავდება მაღალი დონის სადეზინფექციო საშუალებით“, პასუხის გასაცემად შემოწმდება არის თუ არა ადგილზე საკმაო რაოდენობის შალითები, მათ ერთჯერადად გამოსაყენებლად, ან არის თუ არა ყველა საჭირო პირობა მათი წმენდისა და მაღალი დონის დეზინფიცირებისთვის.

11.4 პუნქტზე - „ყოველი მომხმარებლის მომსახურების შემდეგ ეპილატორისთვის განკუთვნილი აღჭურვილობა/ინსტრუმენტები იწმინდება და უტარდება ან სტერილიზაცია ან მაღალი დონის დეზინფექცია“, დადებითი პასუხი გაიცემა იმ შემთხვევაში, თუ ადგილზე იქნება ინსტრუმენტების საწმენდი საშუალებები და/ან სასტერილიზაციო ინვენტარი ან სადეზინფექციო საშუალებები და ინვენტარი.

11.5 პუნქტზე - „სტერილური საგნების დამჭერი ინსტრუმენტები (მაგალითად, პინცეტი) სტერილდება ან უტარდება მაღალი დონის დეზინფექცია“, დადებითი პასუხი გაიცემა იმ შემთხვევაში, თუ ადგილზე იქნება ინსტრუმენტების სასტერილიზაციო ინვენტარი ან სადეზინფექციო საშუალებები და ინვენტარი.

11.6 პუნქტი - „ჩაზრდილი თმის ამოსაღებად გამოიყენება მხოლოდ ერთჯერადი სტერილური ნემსები“, დადებითად შეფასდება თუ ადგილზე იქნება ნანახი ჩაზრდილი თმის ამოსაღებად გამოსაყენებელი ერთჯერადი სტერილური ნემსები, შესაბამის პირობებში შენახული (სადაც გამორიცხული იქნება სტერილობის დარღვევა).

11.7 პუნქტი - „ყოველი გამოყენების შემდეგ იარაღების განსათავსებელი დაფა/ლანგარი, ასევე გამადიდებელი ლუპა, სათვალე და მიკროსკოპი, სანათი იწმინდება და უტარდება დაბალი დონის დეზინფექცია“, დადებითად შეფასდება მაშინ, თუ ადგილზე არსებობს საწმენდი და სადეზინფექციო საშუალებები და ინვენტარი დაბალი დონის დეზინფექციის ჩასატარებლად.

დანართი #7.

12. ვაქსინგი

12.1 პუნქტზე - გამორიცხულია ვაქსინგის ჩატარება ორსული და მეძუპური დედებისთვის, ან მომხმარებლისთვის, რომელსაც აღენიშნება კანის ქრონიკული /მწვავე/ დაავადება, შაქრიანი დიაბეტი“, პასუხის გაცემა შესაძლებელია მხოლოდ ოპერატორის ამ საკითხების ცოდნის შეფასებით.

12.2 პუნქტზე - „კანის დასამუშავებელი ზედაპირი სუფთავდება დამუშავების წინ“, პასუხის გასაცემად ადგილზე უნდა არსებობდეს რომელიმე ანტისეპტიკური ხსნარის მარაგი.

12.3 პუნქტი - „ყველა ხსნარი და კრემი გამოიყენება ერთჯერადი კონტეინერებიდან (ტუბი) ან ერთჯერადი აპლიკატორების საშუალებით მრავალჯერადი კონტეინერებიდან“, დადებითად შეფასდება თუ ხმარებაში არსებული ყველა ხსნარი და კრემი მოთავსებული იქნება კონტეინერებში ან მრავალჯერადი კონტეინერებისთვის ექნებათ ერთჯერადი აპლიკატორების საკმარისი რაოდენობა.

12.4 პუნქტზე - „ცვილისა და ფისის ამოსაღებად გამოყენებული შპატელები და აპლიკატორები იყრება გამოყენებისთანავე“, გაიცემა დადებითი პასუხი შპატელებისა და აპლიკატორების საკმაო რაოდენობით მარაგის და სახიფათო ნარჩენებისთვის განკუთვნილი ერთჯერადი კონტეინერების საკმაო რაოდენობით არსებობის შემთხვევაში (მინიმუმ ერთი დღის საკმარისი რაოდენობა), და თუ აქვთ სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან.

12.5 პუნქტზე - „ნებისმიერი პროცედურა ტარდება მხოლოდ ერთჯერადი ხელთათმანების გამოყენებით“, დადებითი პასუხის გასაცემად საკმარისია ობიექტზე ერთჯერადი ხელთათმანების მარაგის არსებობა და თუ შესაძლებელი იქნება მუშაობის პროცესზე დაკვირვება.

12.6 პუნქტის - „გამოყენებული ხელთათმანები იყრება სახიფათო ნარჩენებისთვის განკუთვნილ ტარაში“, შესაფასებლად ადგილზე უნდა იყოს სახიფათო ნარჩენებისთვის განკუთვნილი ერთჯერადი კონტეინერების საკმაო რაოდენობა, სახიფათო ნარჩენების გატანა-განადგურებაზე ხელშეკრულება შესაბამის ორგანიზაციასთან და ხმარებაში მყოფი კონტეინერი სახიფათო ნარჩენებით.

13. შემოწმების შედეგი - „მოთხოვნები არ არის სრულად დაცული“ მოინიშნება მაშინ, როცა ზოგი დაცულია და ზოგი არა; **„მოთხოვნები სრულად არის დაცული“** მოინიშნება მაშინ, როცა დარღვევები საერთოდ არ ფიქსირდება და **„მოთხოვნები საერთოდ არ არის დაცული“**, მოინიშნება მაშინ, როცა დაუცველი მოთხოვნები უფრო მეტია, ვიდრე დაცული;

14. გამოვლენილი დარღვევების ჩამონათვალში - უნდა ჩამოიწეროს ის პუნქტები, რომელიც არის დარღვეული, მაგ.: 3.4; 4.1; 5,3 და ა.შ.

15. ჩამოთვლილი დარღვევების გამოსასწორებლად მიცემულია გონივრული ვადა - გამოსასწორებლად მიცემული ვადა ითვლება დღებით, მაგალითადად თუ მიეცა ერთი თვე ვადა, პასუხად ჩაიწერება 30 დღე, თუ 2 თვე - 60 დღე და ა.შ.; თუ ერთი კვირა მიეცა ვადად, მაშინ 7 დღე და ა.შ.;

16. გავცანი, ვეთანხმები/არ ვეთანხმები - ამ შეკითხვაზე პასუხს სცემს შემოწმებული ობიექტის ის წარმომადგენელი, რომელიც ესწრებოდა შემოწმებას, იმ შემთხვევაში თუ არ ეთანხმება, უნდა შეივსოს შემდეგი მე-17 პუნქტი;

17. თუ არ ეთანხმებით, რას და რატომ - უნდა ჩამოითვალოს კონკრეტული პუნქტები და გამამართლებელი არგუმენტები; მაგ. 3.5 პუნქტს არ ვეთანხმები იმიტომ, რომ შემოწმების დასრულებამდე უკვე წარმოვადგინე თხევადი საპონი და/ან სხვ.

18. დაწესებულების ხელმძღვანელის/უფლებამოსილი პირის სახელი, გვარი და ხელმოწერა - დაწესებულების ხელმძღვანელი შემოწმების აქტს გაეცნობა და ხელს მოაწერს - შემოწმებლებთან ერთად;

19. შემოწმებლების ხელმოწერა - 1 ან 2 შემოწმებლის ხელმოწერა საკმარისი იქნება;

20. შეივსო ადმინისტრაციული სამართალდარღვევის აქტი - დადებითი პასუხი გაეცემა მხოლოდ აქტის შევსების შემდეგ; შენიშვნაში მითითებული შეიძლება იყოს ის არგუმენტები, რომელთაც შეიძლება განაპირობონ აქტის შევსების ან არ შევსების მომენტები - თუ ვთქვით დამატებითი ვადა მიეცათ კიდევ, განმეორებით, ან სხვ.

შემოწმების აქტის შევსების შემდეგ, შემოწმებლის მიერ მიღებული ინფორმაცია უნდა შეტანილი იქნეს მონაცემთა ბაზაში - დასამუშავებლად და გასაანალიზებლად.